


† Lucas Monn, cavacristallas, Sedrun

Quest unviern ei la bialaura propi stada scarta. Mo la mesjamna, ils 20 da schaner, il di da sepultura da nies bien amitg e vischin Lucas Monn, eisi stau in'aura sco in cural, ei la natira veramein sepresentada en cumpleina bellezia e grondezia sco per render salid e reverenza a siu fautur e promotur ch'ha adina carezau, admirau e protegiu la scaffiziun.

Lucas Monn ei naschius ils 8 da schaner 1918 dils geniturs Gion Antoni, feschner, e Maria Carmelia, nata Beer. El ei carschius si a Sedrun en «Tgèsa nova», ensemen cun ses dus frars Nazi e Stiafen e sia sora Vina. «Ventireivels onns d'affonza», ha el adina detg, «mo a scola sun jeu ius nuidis». Suenter ina cuorta dimora giu la bassa ha el lu surpriu il puresser da ses geniturs. — Demai ch'el luvrava adina aschi bein ed exact, era el ualtı stedi il davos. Mo vonzei vegneva el cun sia pipa crutscha tut a buffond e fagend smanis: «Jeu hai halt'ina stria fuola!»

Avon entgins onns ha el baghegiau casa ed ei lu sereratgs cun sia sora Vina a Niregl. Suenter la prematura mort da sia cara sora ha el giu la sort da viver persuls. Quei viver sul sulet, quei buca veser ina finamira dalla veta ha occupau siu patratg, ha savens squitschau siu cor. «Ti has bi rir», cura che Ti arrives a casa selegran ils Tes, anflas Ti tut bein ordinau e rugalau. Tier mei perencunter ei nuot semuentau, ei tut aschia sco



jeu hai bandunau.» Nuotatonmeins ha el adina ludau ed appreziav il gronds e biars survetschs da siu frar Nazi e consorta Margreta. Tiel Nazi mava el bugen, leu ha el adina anflau carezia e sustegn.

El decuors dil temps ha il bien Lucas reduciu la laver da pur ad in minimum, per aschia saver sededicar a sia occupaziun da preferenza: agl ir per cristallas. Quei ei stau sia gronda pis-siun, siu plascher! Gia sco giuvenot mav'el tut alla metta, ses uaffens zuppai el sacados, per crappa. El leva nuota sensaziun, leva tuttavia buca dar discumet a zatgi. El leva era esser persuls cun sias cristallas. Cul temps han ils auters cavacrappa profitau da sias enconuschientschas, havein nus anflau en el in carstgaun beinvolent, in fidau ed attaschau amitg.

Si ella pézza, leu era il Lucas en siu element, leu era el ventireivels, leu seseurveva era el e scheva far part nus auters da sias legrias e pitgiras. El era buca stermentus tschintschus, mo sia originalitat singulara e sia moda da plidar fagevan surrir il cor da min-tgin. Disciplina veva el era el lungatg. El sesmarvegliava savens ch'in u l'auter dalla capiala aulta trubistgava il plaid romontsch cun expressiuns tudestgas. Ella pezza era el tut beaus! Contas ga ha el raschunau da sias turas, da sias misteriusas anfladas.

«Ina ga», ha el entschiet, «hai jeu anflau si Gioudusas in bi fuorn da cristallas neras. Ei era in bellezia di, ed jeu havevel gia deponiu in tschuat neras per las plattas entuorn. Lu hai jeu fatg in bien caffè e marendau. Tut incantaus dalla maiestusa cuntrada, dalla fina bialaura e dalla bial'anflada, vess jeu saviu giubilar viadura ella tgeaudad: Jeu sun bein il pli ventireivel carstgaun dil mund! Jeu brattass gnanc cul retg!»

Quei era il Lucas, in ver admiratur dalla scaffiziun, in idealist. La natira era per el enzatgei sogn, ed el verteva buca che quella vegneva maculada. El sesenteva obligaus da proteger ella ed ei fageva mal, sch'el, veseva che quei sogn uorden vegneva disturbaus. Scheva zatgi anavos curdems, lu vegnev'el en furia e sevilava da forza. Il Lucas era in fin cavacristallas, ha fatg biaras e bialas anfladas. Sias scaffas e truchets conservan rars sca-zis rimnai cun tutta carezia. Sco ei era sia voluntad, sperein era nus che quella collecziun singula vegni mantenida en pietad dil versau cavacristallas. — El che ha adina demussau respect visavi il relasch da nos babs,

ch'ha tgirau e mantenui ton vegl, me-reta segiramein quei monument.

Il car defunct ha era adina fatg part dalla veta communabla. Curonta onns ei el staus musicant, ed igl ei stau impressiunont cura che ses amitgs musicants han sunau per el il salid da fossa. In bien cumedian era el era. Contas gadas ha el delectau ils aspectaturs cun ina ni l'autra rolla humoristica. Il bien Lucas era in tip comic. Sia originalitat, siu far e demanar natural era unics, in ver de-letg. Perquei era el era dapertut bein-vesius, in camerat che saveva legrar cun sias anecdotas e strufientschas l'entira tablada.

Il car bien Lucas ei buca pli, ed igl ei vegniu pli vit. In carstgaun da pro-funda cardientscha ei ius. Era il bien Lucas ha giu da purtar siu buordi, ei staus sut la lescha dil pitir, dil dubel pitir dil tgierp e dall'olma. Ils 18 da schaner ei siu pitir ius alla fin, ha la mort spindrau el dallas cadeinas dal-la veta terrestra. El ch'ha adina mess il scaffider sur tut, ha segiramein an-flau in migievel derschader. Bien amitg, rauissa en pasch!

V.B.